

KELUARAN KE-11

e-BULETIN

JSKM

EDISI APRIL 2024

USAH GUSAR MENJADI PEMIMPIN

*"Setiap dari kita ada ciri-ciri
kepimpinan sama ada ianya
terserlah atau tersembunyi."*

TS. JAMAL OTHMAN

FALSAFAH
HUKUM
JINAYAH
ISLAM

TIPS MEMBANTU
ANAK MENGHAFAZ
AL-QURAN DARI
KECIL

KISAH DUKA BAYI
DI PALESTIN

FASA DI HUJUNG
NYAWA



e-ISSN-2637-0077



perkongasian



RAHSIA PANTANG LARANG NENEK MOYANG

Oleh Norazah Umar

Pantang larang merupakan salah satu perkara yang sangat sinonim dengan budaya orang Melayu zaman dahulu. Walaupun pantang larang ini bunyinya seperti ingin menakutkan namun setiap pantang mempunyai maksud yang tersirat. Di sebaliknya, terselindung nilai-nilai yang boleh diamalkan masyarakat khususnya generasi muda dalam kehidupan seharian mereka. Walaupun begitu semakin hari pantang larang ini semakin pudar akibat berlakunya arus pemodenan. Kebanyakan pantang pun dianggap lapuk dan tidak lagi dipercayai oleh generasi kini berbanding orang dulu-dulu. Mari kita lihat apakah rasionalnya pantang larang yang sering diungkap oleh nenek moyang kita. Di antara pantang larang yang popular dan sering didengar adalah seperti yang tertulis di bawah:

01 Anak dara jangan menyanyi di dapur nanti kahwin dengan orang tua

Rasionalnya: Perbuatan ini selain daripada dilihat tidak sopan ianya boleh menyebabkan kelalaian seperti masakan hangus sebab leka menyanyi.

02 Makan biar setempat, kalau berpindah-pindah tempat nanti kahwin ramai

Rasionalnya: Ia dilihat tidak sopan kalau makan pindah-randah. Ada orang yang makannya bersepah, jadi makan berpindah tempat boleh menyebabkan berlakunya sepah di beberapa tempat.

03 Jangan potong kuku waktu malam, nanti rezeki sempit

Rasionalnya: Rumah zaman dahulu tiada elektrik dan bergantung pada lilin dan pelita sahaja. Memotong kuku pada waktu malam boleh memudaratkan di mana keadaan yang agak gelap boleh menyebabkan terhiris atau terpotongnya jari.

04 Jangan mengintai orang mandi, nanti naik ketumbit

Rasionalnya: Mengintai itu merupakan perbuatan yang salah tetapi ianya agak sukar untuk dijelaskan kepada kanak-kanak. Oleh itu orang tua dulu-dulu menggunakan ugutan penyakit mata ketumbit untuk menakutkan kanak-kanak supaya tidak mengintai kerana ugutan lebih berkesan berbanding nasihat.

05 Jangan duduk atas bantal, nanti naik bisul

Rasionalnya: Kualiti bantal dulu-dulu tak sama dengan bantal zaman sekarang. Diperbuat daripada kekabu dengan sarung yang dijahit sendiri. Kalau di duduk-duduk atasnya, jahitan akan rosak dan kekabu akan terkeluar.

06 Jangan meniarap naik kaki atas, nanti mak ayah mati awal

Rasionalnya: Sebenarnya dulu-dulu ramai gadis memakai kain sarung. Jadi pantang larang ini dicipta bertujuan nak mengelakkan kain gadis-gadis semua tu daripada terselak nampak tak senonoh.

07

Jangan tunjuk pelangi dengan jari telunjuk, nanti kudung

Rasionalnya: Apabila kita menunjukkan ke arah sesuatu benda adalah lebih sopan jika kita menggunakan ibu jari. Pantang larang ini sebenarnya hendak melarang kita menggunakan jari telunjuk apabila kita menunjuk pada sesuatu, kerana kadangkala menggunakan jari telunjuk boleh nampak seperti kita sedang marah.

08

Ibu hamil dilarang menyusup di bawah ampaian kerana ditakuti anak akan terencat akalnya

Rasionalnya: Penyidai kain biasanya rendah, maka dikhuatiri ibu hamil tersebut akan tersadung dan boleh membahayakan kandungan jika dia lalu di bawah ampaian.

09

Dilarang menjahit di badan kerana dikhuatiri sukar membayar hutang

Rasionalnya: Perbuatan ini agak merbahaya dan ditakuti mendatangkan kecederaan kepada badan.

10

Jangan lalu bawah ampaian nanti pening kepala

Rasionalnya: Zaman dahulu mesin basuh masih belum wujud apatah lagi kedai dobi layan diri. Mereka terutamanya wanita perlu membasuh pakaian menggunakan kudrat tangan dan menjemurnya di ampaian. Jika ada yang lalu atau bermain di bawah ampaian ada kemungkinan pakaian tersebut akan jatuh ke tanah. Kesannya, pakaian tersebut jadi kotor dan perlu dibasuh untuk kali kedua. Sangat memenatkan jika diulang dengan basuhan tangan.

11

Selepas makan, tuang air sikit dalam pinggan kalau tidak rezeki jadi kering

Rasionalnya : Orang melayu terkenal dengan masakan yang berminyak seperti sambal tumis, kari dan pelbagai lagi masakan yang ditumis dan digoreng. Apabila digaulkan dengan nasi dan lauk lain ketika makan akan menyebabkan pinggan tersebut susah untuk dibasuh. Sisa-sisa lauk akan melekat apabila sudah kering. Oleh itu, menuangkan sedikit air supaya dapat mengelak perkara ini dan memudahkan untuk dibasuh.

12

Jangan mandi malam, nanti paru-paru basah

Rasionalnya : Bilik mandi orang zaman dulu bukan seperti zaman sekarang yang semuanya berada di dalam rumah. Bilik air mereka berada di bahagian luar rumah. Di waktu malam suasana di luar rumah sangat gelap, tiada lampu jalan, yang ada hanya cahaya bulan. Kalau berjalan malam-malam nak ke tandas mungkin boleh terpijak duri atau digigit haiwan berbisa.